

აკადემიური საბჭო  
დადგენილება N 4  
მაგისტრატურის შესახებ

1. დანიშნულება. მიზნები:

უმაღლესი აკადემიური განათლების მეორე საფეხურის-მაგისტრატურის დანიშნულებას და მიზნებს განსაზღვრავს კანონი “უმაღლესი განათლების შესახებ.”

2. სამაგისტრო სპეციალიზაციათა ჩამონათვალი.

მაგისტრანტთა მომზადების უფლება.

2.1. სპეციალიზაცია, რომელშიც საქართველოს ტექნიკური უნივერსიტეტი ამზადებს მაგისტრს, უნდა აკმაყოფილებდეს შემდეგ მოთხოვნებს:

- \_ უნდა წარმოადგენდეს ფაკულტეტის საგანმანათლებლო/კვლევითი მიმართულებებიდან ერთ-ერთის შემადგენელ მსხვილ კომპონენტს;
- \_ უზრუნველყოფილი უნდა იყოს სასწავლო-მეთოდური და სამეცნიერო ლიტერატურით, სასწავლო და სამეცნიერო-კვლევითი ბაზით, შესაბამისი აკადემიური ხარისხის მქონე პერსონალით.

\* სპეციალიზაციათა წარდგენის ფორმა. იხ. დანართი I

2.2. ფაკულტეტის საბჭოს გადაწყვეტილებით დამტკიცებული სამაგისტრო სპეციალიზაციათა ჩამონათვალი, წარედგინება საქართველოს ტექნიკური უნივერსიტეტის ხარისხის უზრუნველყოფის სამსახურს, რომელიც ადგენს მის შესაბამისობას პუნქტ 2.1-ში მოცემულ მოთხოვნებთან, რის შემდეგაც დასამტკიცებლად წარუდგენს საქართველოს ტექნიკური უნივერსიტეტის აკადემიურ საბჭოს.

2.3. დამტკიცებული სპეციალიზაციისთვის მომზადებული საგანმანათლებლო პროგრამა, განხილული ფაკულტეტის ხარისხის უზრუნველყოფის სამსახურში

და დამტკიცებული ფაკულტეტის საბჭოს მიერ წარედგინება უნივერსიტეტის ხარისხის უზრუნველყოფის სამსახურს, რომელიც სამაგისტრო საგანმანათლებლო პროგრამებს დასამტკიცებლად წარუდგენს უნივერსიტეტის აკადემიურ საბჭოს.

- 2.4. მაგისტრანტთა მომზადების უფლება დამტკიცებული სპეციალიზაციების მიხედვით, პუნქტი 2.3-ში აღწერილი პროცედურის გავლასთან ერთად, გაიცემა საქართველოს ტექნიკური უნივერსიტეტის აკადემიური საბჭოს მიერ 4 წლით.

### **3. სამაგისტრო საგანმანათლებლო პროგრამა**

**სამაგისტრო საგანმანათლებლო პროგრამა (შემდგომში პროგრამა) უნდა მოიცავდეს შემდეგ ძირითად საკითხებს:**

- 3.1. **პროგრამის დასახელება.** პროგრამის სახელწოდება უნდა ასახავდეს იმ სპეციალობას, რომელშიც მაგისტრანტს აკადემიური ხარისხი მიენიჭება. წარმოდგენილი უნდა იყოს პროგრამის დასახელების ინგლისური თარგმანი.
- 3.2. **მისანიჭებელი აკადემიური ხარისხი.** მითითებულ უნდა იქნას მისანიჭებელი აკადემიური ხარისხი, რომელიც უნდა ასახავდეს მაგისტრანტის კვალიფიკაციას. აუცილებლად უნდა იქნას მითითებული ხარისხის ინგლისური თარგმანი.
- 3.3. **პროგრამის ანალოგი.** მითითებულ უნდა იქნას (მინიმუმ ორი) ევროპის, აშშ და/ან მსოფლიოში წამყვან სხვა რომელ უნივერსიტეტში ხორციელდება მსგავსი სამაგისტრო პროგრამა. მიუთითეთ უნივერსიტეტის ვებ-გვერდი და ანალოგი პროგრამის დასახელება.

### **3.4. სამაგისტრო პროგრამის საკვალიფიკაციო დასახელება.**

მითითებული უნდა იქნას შემდეგი სახის ინფორმაცია:

- **მიზანი** – მოკლედ უნდა იქნას აღწერილი სამაგისტრო პროგრამის მიზანი;

- **შედეგი** – მოკლედ უნდა იქნას აღწერილი სამაგისტრო პროგრამის დასრულების შემდეგ კურსდამთავრებულის დარგობრივი კვალიფიკაცია, მისი ცოდნა და კომპეტენცია. მაგისტრის კვალიფიკაცია განისაზღვრება მისი ზოგადი და დარგობრივი კომპეტენციებით;
- **დასაქმების სფეროები** – მითითებულ უნდა იქნას, სად შეეძლება მუშაობა აღნიშნული სამაგისტრო პროგრამის კურსდამთავრებულს;
- აუცილებლად მითითებულ უნდა იქნეს, რომელ სპეციალიზაციებში უნდა ჰქონდეს მიღებული ბაკალავრის ხარისხი იმისათვის, რომ შესაძლებელი იყოს მისი წარმოდგენილი სამაგისტრო პროგრამით მომზადება.

### 3.5. პროგრამის სტრუქტურა

- წარმოდგენილი უნდა იყოს ცხრილის სახით, სტუ-ში მიღებული ფორმით საგნების/მოდულების ჩამონათვალი მათი კრედიტები და განაწილება სემესტრების მიხედვით.
- მითითებული უნდა იყოს საგნის/მოდულის სტატუსი – ძირითადი თუ არჩევითი. ამ უკანასკნელთა მოცულობა არ უნდა აღემატებოდეს პროგრამის საერთო მოცულობის 50%-ს.
- პროგრამის მოცულობა – არანაკლებ 120 ევროკრედიტი; აკადემიური წლის განმავლობაში – 60 ევროკრედიტი, სემესტრში – 30 ევროკრედიტი.
- კვლევითი კომპონენტის მოცულობა არანაკლებ 30 ევროკრედიტის და არაუმეტეს 40 ევროკრედიტისა.

### 3.6. საგნის/მოდულის სილაბუსი

წარმოდგენილ უნდა იქნას თითოეული საგნის სილაბუსი სტუ-ში მიღებული ფორმის მიხედვით.

### 3.7. მაგისტრანტის ხელმძღვანელი შეიძლება იყოს შესაბამისი მიმართულების სრული ან ასოცირებული პროფესორი.

ხელმძღვანელის მოვალეობაა, უზრუნველყოს წარმოდგენილი სამაგისტრო პროგრამის განხორციელება. იგი ადგენს მაგისტრანტისთვის საჭირო საგნების/მოდულების ჩამონათვალს საგანმანათლებლო პროგრამის არჩევითი სტატუსის მქონე საგნებიდან/მოდულებიდან, უზრუნველყოფს საგანმანათლებლო პროგრამის კვლევითი კომპონენტის განხორციელებას. ხელმძღვანელის CV წარმოდგენილი უნდა იყოს დანართი 2-ში მოცემული ფორმით.

#### 4. ერთობლივი სამაგისტრო პროგრამების შემუშავება

შესაძლებელია ერთობლივი სამაგისტრო პროგრამის შემუშავება. სამაგისტრო პროგრამის განხორციელება პარტნიორი ორგანიზაციის მონაწილეობით რეგულირდება ამ ორგანიზაციასთან დადებული შეთანხმებით თანამშრომლობისა და ერთობლივი სამაგისტრო პროგრამის შესახებ.

ერთობლივი სამაგისტრო პროგრამის შემთხვევაში პროგრამას შეიძლება ჰყავდეს ორი ხელმძღვანელი. სტუ-ს ხარისხის უზრუნველყოფის სამსახურში განხილვისათვის წარსადგენი ერთობლივი სამაგისტრო პროგრამები უნდა აკმაყოფილებდეს ზემოთ მოყვანილ ყველა პირობას. ამის გარდა, აუცილებლად უნდა მიეთითოს შემდეგი ინფორმაცია:

- პარტნიორი უნივერსიტეტის დასახელება;
- ხელშეკრულება პარტნიორ უნივერსიტეტთან ერთობლივი სამაგისტრო პროგრამის განხორციელების თაობაზე (ხელშეკრულებაში ასევე უნდა აღინიშნოს ერთობლივი აკადემიური ხარისხის მინიჭების პირობები, თუ ეს იგეგმება).
- სამაგისტრო პროგრამის ხელმძღვანელი ან საკონტაქტო პირი, რომელიც ერთობლივი პროგრამის განხორციელებას კურირებს პარტნიორ უნივერსიტეტში;

- სამაგისტრო პროგრამის სწავლების ენა (უცხოელი პარტნიორების შემთხვევაში);
- სამაგისტრო პროგრამის კომპონენტები, რომლებიც განხორციელდება პარტნიორ უნივერსიტეტში (საგნები, კვლევა, პრაქტიკა, ლექტორების მოწვევა და ა.შ.);
- პარტნიორი უნივერსიტეტის ფინანსური მონაწილეობა ერთობლივი სამაგისტრო პროგრამის განხორციელებისას.

## 5. მაგისტრატურაში ჩარიცხვა

- 5.1. მაგისტრატურაში სწავლების უფლება ეძლევათ ბაკალავრის აკადემიური ხარისხის მქონე პირებს რომელთაც გააჩნიათ შესაბამისი დიპლომი.
- 5.2. მაგისტრატურაში სწავლის უფლება ასევე შეიძლება მიენიჭოთ ბაკალავრიატის უმაღლესი განათლების მქონე იმ კურს დამთავრებულ პირებს, რომელთა დაგროვილი კრედიტების რაოდენობა იქნება შესაბამისი 240 ევროკრედიტისა. დაგროვილ კრედიტთა შესაბამისობას 240 ევროკრედიტთან ადგენს საქართველოს ტექნიკური უნივერსიტეტის ხარისხის უზრუნველყოფის სამსახური.
- 5.3. მაგისტრატურაში სტუდენტის ჩარიცხვის აუცილებელი წინაპირობაა ერთიანი საფაკულტეტო სამაგისტრო გამოცდების ჩაბარება სპეციალურ საგამოცდო კომისიებთან, რომელთაც მაგისტრატურაში მისაღები გამოცდების გამოცხადებისას აყალიბებს ფაკულტეტის საბჭო.
- 5.4. გამოცდების რაოდენობას, დისციპლინებსა და ტესტების საკითხებს შეიმუშავებს ფაკულტეტის ხარისხის უზრუნველყოფის სამსახური სამაგისტრო პროგრამების ხელმძღვანელებთან შეთანხმებით და ამტკიცებს ფაკულტეტის საბჭო.
- 5.5. საფაკულტეტო სამაგისტრო გამოცდების დანიშვნის შესახებ განცხადება უნდა გაკეთდეს მისი ჩატარების თარიღიდან არა ნაკლებ ერთი თვით ადრე.

5.6. მაგისტრატურაში მიმღები საფაკულტეტო კომისიების რაოდენობასა და შემადგენლობას განსაზღვრავს და ამტკიცებს ფაკულტეტის საბჭო.

5.7. ფაკულტეტის მიხედვით მაგისტრატურაში ჩასარიცხ სტუდენტთა რაოდენობას, აგრეთვე ჩარიცხული კონტიგენტის სწავლების სხვადასხვა ფორმას (საბიუჯეტო, არასაბიუჯეტო) შორის პროცენტულ თანაფარდობას ადგენს სტუ-ს აკადემიური საბჭო.

5.8. ფაკულტეტის საბჭო ამტკიცებს მაგისტრატურაში ჩარიცხული სტუდენტის ხელმძღვანელსა და სამაგისტრო თემას.

## 6. მაგისტრატურაში განაცხადის შეტანის პროცედურა.

6.1. მაგისტრატურაში მიმღებ შესაბამის საგამოცდო კომისიაში (პუნქტი 5.3) მაგისტრატურაში სწავლის მსურველმა უნდა წარმოადგინოს შემდეგი დოკუმენტები:

6.1.1. განაცხადი. (იხ. დანართი 3)

6.1.2. პირადობის მოწმობის ასლი

6.1.3. დიპლომის დანართი, დადგენილი ფორმით სადაც ნაჩვენები იქნება ბაკალავრიატში სწავლის დროს დაგროვილი კრედიტების რაოდენობა.

6.1.4. ორი რეკომენდაცია (იხ. დანართი 4) რეკომენდაცია უნდა იქნეს წარმოდგენილი იმ ორგანიზაციიდან სადაც კონკურსანტი საბაკალავრო პროგრამას გადიოდა. თუ ასეთი ორგანიზაცია რამდენიმეა მაშინ ორგანიზაციიდან სადაც გაიარა საბაკალავრო პროგრამის ძირითადი ნაწილი.

6.1.5. აღნიშნული დოკუმენტაციის წარდგენის შემდეგ კონკურსანტს საგამოცდო კომისიის (პუნქტი 5.3) პასუხისმგებელი პირი გადასცემს საგამოცდო ფურცელს, რომელშიც უნდა იყოს მითითებული საგამოცდო დისციპლინების ჩამონათვალი, ჩატარების თარიღი, დრო, აუდიტორია.

- 6.2. კონკურსანტმა უნდა გაიაროს საფაკულტეტო სამაგისტრო გამოცდები საგამოცდო ფურცელში აღნიშნულ დისციპლინებსა და ვადებში.
- 6.3. ზემოთჩამოთვლილი (6.1.1, 6.1.2, 6.1.3) დოკუმენტების არასრულად წარმოდგენის შემთხვევაში კონკურსანტის პირადი საქმე არ განიხილება.

## 7. სასწავლო პროცესი და კვალიფიკაციის მინიჭება.

- 7.1. სასწავლო პროცესი მიმდინარეობს სამაგისტრო საგანმანათლებლო პროგრამის შესაბამისად, რომლის საფუძველი არის შესაბამისი სპეციალიზაციისთვის შედგენილი სამაგისტრო საგანმანათლებლო პროგრამა, რომელიც მოიცავს ძირითად საგნებს/მოდულებსა და სამაგისტრო თემის შესაბამის არჩევით საგნებს/მოდულებს. (პუნქტი 3.5).
- 7.2. მაგისტრანტის მიერ სათანადო მიმართულებით მიღებული შედეგები აისახება მის მიერ, საჭირო ფორმით (პუნქტი 7.5) გაფორმებულ სამაგისტრო ნაშრომში.
- 7.3. მაგისტრანტის საკვალიფიკაციო ნაშრომი წარმოადგენს დასრულებულ სამუშაოს, რომელიც უნდა ასახავდეს კურსდამთავრებულის უნარს ჩაატაროს სამეცნიერო-კვლევითი, საპროექტო ან სხვა სახის სამუშაოები.  
წარმოდგენილი საკვალიფიკაციო ნაშრომის დაცვისას მაგისტრანტმა უნდა წარმოადგინოს მის მიერ შესრულებული სამუშაო და წარმოაჩინოს დისკუსიაში მონაწილეობის უნარი.
- 7.4. სამაგისტრო ნაშრომის დაცვა ხორციელდება ფაკულტეტის საბჭოს მიერ დანიშნულ საგამოცდო კომისიაზე (პარაგრაფი 8).
- 7.5. სამაგისტრო ნაშრომი უნდა შესრულდეს ქართულ ენაზე. ფაკულტეტის საბჭოს ნებართვით დასაშვებია მისი სხვა ენაზე შესრულება. ნაშრომის გაფორმების წესსა და მოცულობას ადგენს სტუ-ს ხარისხის უზრუნველყოფის სამსახური. სამაგისტრო ნაშრომს დართული უნდა ჰქონდეს ხელმძღვანელისა და რეცენზენტის წერილობითი დასკვნა.

საგამოცდო კომისია რეცენზენტად ამტკიცებს პირს, რომელსაც სამაგისტრო ნაშრომის შესაბამის/მონათესავე სპეციალიზაციაში გამოქვეყნებული აქვს სულ მცირე სამი ნაშრომი. რეცენზენტი არ შეიძლება იყოს:

მაგისტრანტის მიერ შესრულებული რომელიმე სამუშაოს თანაავტორი, აგრეთვე უშუალოდ იმ სტუქტურული ერთეულის თანამშრომელი, სადაც მიმდინარეობდა მაგისტრატურაში სწავლა/კვლევა.

7.6. რეცენზენტის დასკვნაში მითითებული უნდა იყოს გადაწყვეტილება სამაგისტრო ნაშრომის დაცვაზე დაშვების, მისი შესწორების მიზნით მაგისტრანტისათვის უკან დაბრუნების ან დაცვაზე უარის თქმის შესახებ. უმნიშვნელო შენიშვნების შემთხვევაში სამაგისტრო ნაშრომის მიღება ხდება ხარვეზების გამოსწორების დათქმით. რეცენზენტი სამაგისტრო ნაშრომის შეფასებას ახდენს შემდეგი სისტემის მიხედვით:

- “საუკეთესო” \_ (91-100 ქულა)
- “მალიან კარგი” \_ (81-90 ქულა)
- “კარგი” \_ (71-80 ქულა)
- “საშუალო” \_ (61-70 ქულა)
- “დამაკმაყოფილებელი” \_ (51-60 ქულა)
- “არადამაკმაყოფილებელი” \_ (41-50 ქულა)
- “ცუდი” \_ (0-40 ქულა)

7.7. შესწორების მიზნით მაგისტრანტისათვის უკან დაბრუნების შემთხვევაში, სამაგისტრო ნაშრომი ხელახლა უნდა იქნას წარდგენილი 6 თვის ვადაში. ხელახლა წარმოდგენილი სამაგისტრო ნაშრომის კვლავ “არადამაკმაყოფილებელი” შეფასების შემთხვევაში მაგისტრანტის ნაშრომი აღარ განიხილება.

7.8. შეფასება “ცუდი” მიღების შემთხვევაში სამაგისტრო ნაშრომი არ მიიღება დასაცავად. მაგისტრანტს უფლება აქვს რეცენზენტის შეფასება “ცუდი”



გაასაჩივროს საგამოცდო კომისიაში, კომისია განიხილავს საჩივარს და იღებს საბოლოო გადაწყვეტილებას.

## **8. საგამოცდო კომისია. დაცვა**

8.1. ფაკულტეტის საბჭოს თავმჯდომარე ფაკულტეტის ხარისხის უზრუნველყოფის სამსახურის უფროსთან შეთანხმებით სამაგისტრო ნაშრომის დასაცავად ემნის საგამოცდო კომისიებს.

8.2. საგამოცდო კომისია უნდა შედგებოდეს შესაბამისი/მონათესავე სპეციალიზაციის არა ნაკლებ ხუთი და არა უმეტეს შვიდი სრული/ასოცირებული პროფესორისგან.

8.3. საგამოცდო კომისიაში ასევე შეიძლება შეყვანილ იქნეს დოქტორის აკადემიური ხარისხის მქონე პირი მოწვეული სხვა ორგანიზაციიდან.

8.4. საგამოცდო კომისიას ხელმძღვანელობს ფაკულტეტის საბჭოს მიერ დამტკიცებული თავმჯდომარე, რომელიც უნივერსიტეტის მოქმედი ან საპატიო პროფესორი. დაცვას უნდა ესწრებოდეს კომისიის შემადგენლობის ნახევარზე მეტი.

8.5. დაცვა არის საჯარო, მის მსვლელობასა და შედეგზე უნდა შედგეს საბოლოო ოქმი

8.6. დაცვა ითვალისწინებს მაგისტრანტის მიერ თემის წარმოდგენას/პრეზენტაციას. მოხსენებას მოსდევს შეკითხვა/კამათი.

8.7. საგამოცდო კომისიის ერთ სხდომაზე შეიძლება ჩატარდეს რამდენიმე სამაგისტრო ნაშრომის დაცვა.

## **9. შეფასება**

9.1. ნაშრომი ფასდება საგამოცდო კომისიის მიერ, დახურულ სხდომაზე დაცვის დასრულებისთანავე.

9.2. გამოიყენება შეფასების შემდეგი სისტემა:

- a) საუკეთესო \_ შესანიშნავი ნაშრომი;
- b) ძალიან კარგი \_ შედეგი, რომელიც წაყენებულ მოთხოვნებს ყოველ მხრივ აღემატება;
- გ) კარგი \_ შედეგი, რომელიც წაყენებულ მოთხოვნებს აღემატება;
- დ) საშუალო \_ შედეგი, რომელიც წაყენებულ მოთხოვნებს ყოველმხრივ აკმაყოფილებს;
- ე) დამაკმაყოფილებელი \_ შედეგი, რომელიც ხარვეზების მიუხედავად წაყენებულ მოთხოვნებს მაინც აკმაყოფილებს;
- ვ) ცუდი \_ შედეგი, რომელიც წაყენებულ მოთხოვნებს მნიშვნელოვანი ხარვეზის გამო ვერ აკმაყოფილებს.

9.3. სამაგისტრო ნაშრომი არ ითვლება დაცულად, თუკი მას საგამოცდო კომისიის უმრავლესობა აფასებს როგორც „ცუდი“.

9.4. საგამოცდო კომისიის თავმჯდომარე საგამოცდო კომისიის დასაბუთებულ გადაწყვეტილებას მაგისტრანტს აცნობს ზეპირად.

9.5. თუ სამაგისტრო ნაშრომი არ იქნა დაცული, დაცვის გამეორება შესაძლებელია მომდევნო 6 თვის განმავლობაში. მაგისტრანტის განცხადება განმეორებითი დაცვის მოთხოვნის შესახებ საგამოცდო კომისიას უნდა წარედგინოს შედეგის გამოცხადებიდან 1 თვის განმავლობაში.

#### 10. მაგისტრის აკადემიური ხარისხის დამადასტურებელი მოწმობა/დიპლომი

მაგისტრის აკადემიური ხარისხის მინიჭების დამადასტურებელ მოწმობას/დიპლომს გასცემს ტექნიკური უნივერსიტეტი.

#### 11. ბათილობა

სამაგისტრო ნაშრომის საქმის წარმოებისას არასწორი მონაცემების წარდგენა არის მაგისტრის აკადემიური ხარისხის დამადასტურებელი მოწმობის/დიპლომის არ გასცემის ან ჩამორთმევის საფუძველი. შესაბამის გადაწყვეტილებას იღებს ფაკულტეტის საბჭო.